

CONVENIO DE COLABORACIÓN ENTRE A CONSELLERÍA DE SANIDADE, O SERVIZO GALEGO DE SAÚDE, E A UNIVERSIDADE DA CORUÑA PARA A XESTIÓN DAS TAXAS E PREZOS PÚBLICOS CORRESPONDENTES Á ESCOLA UNIVERSITARIA DE ENFERMERIA DEPENDENTE DA CONSELLERÍA DE SANIDADE E ADSCRITA Á CITADA UNIVERSIDADE.

MEMORIA XUSTIFICATIVA

O xerente do Servizo Galego de Saúde, DECLARA:

Que a Consellería de Sanidade, o Servizo Galego de Saúde, e a Universidade da Coruña (UDC) formalizaron o 29 de xuño de 2022 o instrumento convencional arriba referido que producirá efectos durante un período de catro anos desde a data da súa sinatura, con posibilidade de catro prórrogas anuais.

Que o instrumento convencional ten por obxecto establecer as previsións relativas ao réxime económico que rexerá as relacións entre os centros adscritos e a universidade de adscrición, no que atinxe ao réxime de prezos que teñen que satisfacer os e as estudantes nas ensinanzas que se imparte na Escola Universitaria de Enfermaría.

Que existe converxencia de intereses entre as entidades asinantes en orde á consecución do obxecto referido.

Que o instrumento convencional que se pretende asinar se fundamenta no seguinte:

De conformidade co previsto no Decreto 242/2008, de 9 de outubro, polo que se regulan a natureza, os fins e os órganos de goberno das escolas universitarias de enfermaría dependentes da Consellería de Sanidade, esta posúe a titularidade das escolas universitarias de enfermaría de A Coruña, Lugo, Ourense e Vigo.

Estas escolas son centros adscritos ás universidades de Galicia, en virtude da sinatura do convenio, do 7 de febreiro de 1985, entre o Instituto Nacional da Saúde e a Universidade de Santiago de Compostela, do Convenio do 10 de outubro de 1989, entre a Universidade de Vigo e a Deputación Provincial de Ourense, e o regulado na Lei 11/1989, do 20 de xullo, de universidades de Galicia e no Decreto 3/1990, do 11 de xaneiro, de segregación de centros e servizos da Universiades de Santiago de Compostela e da súa integración nas universidades da Coruña e Vigo.

De conformidade co artigo 1 do Decreto 242/2008, do 9 de outubro, as escolas universitarias de enfermaría de titularidade da Consellería de Sanidade da Coruña, Lugo, Ourense e Vigo, son centros docentes de formación universitaria, nos que se cursa a titulación de diplomatura de enfermaría, master e doutorado, de acordo coa normativa vixente, e aquelas outras titulacións que no futuro se determinen. O título de Graduado/a en enfermaría é expedido pola universidade á que cada unha está adscrita.

A tal efecto, a Escola Universitaria de Enfermaría de A Coruña está adscrita á Universidade de A Coruña; a Escola Universitaria de Enfermaría de Lugo está adscrita á Universidade de Santiago de Compostela; e as escolas Universitarias de Enfermaría de Ourense e Vigo están adscritas á Universidade de Vigo.

Segundo a mesma disposición regulamentaria correspóndenlle á universidade de adscrición de cada escola as competencias recollidas na normativa vixente, tanto a nivel estatal como autonómico, e nos respectivos estatutos e normas de desenvolvemento relativas aos centros adscritos.

O Decreto 103/2021, de 1 de xullo, polo que se fixan os prezos públicos pola prestación de servizos académicos e administrativos nas universidades do Sistema universitario de Galicia para o curso académico 2021/22, prevé no seu artigo 3 que *"o alumnado dos centros adscritos aboará á universidade, en concepto de expediente académico e de proba de avaliación, o 25 % dos prezos establecidos na tarifa primeira do anexo, sen prexuízo do establecido no correspondente convenio que dito centro teña asinado coa respectiva universidade. Os demais prezos aboaranse na contía íntegra prevista."*

Con data do 20 de agosto do 2021 o Servizo Galego de Saúde e a Universidade da Coruña asinaron un acordo para a xestión do cobro das matrículas do alumnado da Escola Universitaria de Enfermería da Coruña, restrinxida ao curso académico 2021/2022.

Co obxecto de unificar e simplificar os criterios de xestión, facilitar ao alumnado dos centros adscritos o procedemento de pagamento dos prezos públicos aplicables, e adaptar as adscrición vixentes das Escolas Universitarias de Enfermaría aos principios de xestión determinados na Lei 6/2013, do 13 de xuño, do Sistema universitario de Galicia, así como ás previsións regulamentarias relativas ao cobro dos prezos públicos aplicables ao alumnado dos centros adscritos, cómpre establecer mediante o presente convenio a regra aplicable á Escola Universitaria de Enfermaría adscritas á Universidade da Coruña para a xestión das taxas e prezos públicos correspondentes.

Por todo o anterior e, tendo en conta as razóns de interese público, non resulta posible promover concorrencia pública.

Que os intereses converxentes das partes asinantes exclúen o ánimo de lucro, e non poden satisfacerse axeitadamente mediante a celebración dun contrato dos contemplados na Lei 9/2017, do 8 de novembro, de Contratos do Sector público, ou outro instrumento alleo á natureza estritamente convencional.

En atención ao exposto, e a fin de dar cumprimento ao preceptuado no artigo 15.2 da Lei 1/2016, do 18 de xaneiro, de transparencia e bo goberno de Galicia, estímase xustificado o recurso á sinatura do instrumento convencional, con exclusión doutras figuras.

O xerente do Servizo Galego de Saúde

José Flores Arias.

